

四庫全書

集部

欽定四庫全書

集部

樂府詩集卷十六

四至

詳校官庶吉士_臣柳邁祖

助教_臣常循覆勘

總校官知縣_臣繆琪

校對官編修_臣秦瀛

謄錄監生_臣孫承基

欽定四庫全書

樂府詩集卷八十四

雜歌謠辭

歌辭

戚夫人歌

漢書外戚傳曰高祖得定陶戚姬愛幸生

趙隱王如意惠帝立呂后為皇太后廼令

永巷囚戚夫人髡鉗衣赭衣令舂戚夫人
舂且歌太后聞之大怒曰乃欲倚子邪召
趙王殺之戚夫人遂有人彘之禍

子為王母為虜終日舂薄暮常與死為伍相離三千里
當誰使告汝

畫一歌

漢書曰惠帝時曹參代相何為相國初高
帝與何定天下法令既明具及參守職舉

事無所變更一遵何之約束於是百姓歌
之

蕭何為法講若畫一曹參代之守而勿失載其清靜民
以寧壹

趙幽王歌

漢書曰趙幽王友高帝之子孝惠時友以
諸呂女為后不愛愛他姬諸呂女讒之於
太后太后怒召趙王置邸令衛圍守之趙

王餓乃作歌遂幽死

諸呂用事兮劉氏微迫脅王侯兮彊受我妃我妃既妒
兮誣我以惡讒女亂國兮上曾不寤我無忠臣兮何故
棄國自快中野兮蒼天與直吁嗟不可悔兮寧早自賊
為王餓死兮誰者憐之呂氏絕理兮託天報仇

淮南王歌

漢書曰淮南厲王長高帝少子也長廢法
不軌文帝不忍置於法廼載以輜車處蜀

嚴道邛郫遣其子子母從居長不食而死
後民有作歌歌淮南王帝聞之廼追尊淮
南王為厲王置園如諸侯儀

一尺布尚可縫一斗粟尚可舂兄弟二人不相容

京兆歌

陸厥

通典曰京兆馮翊扶風皆古雍州之域秦
始皇以為內史漢景帝二年分置左右內
史武帝改左內史為左馮翊右內史為右

扶風後與京兆號三輔故趙廣漢云亂吾
治者常二輔是也

兔園夾池水脩竹復檀欒不如黃山苑儲胥與露寒
遷迤傍無界岑峯鬱上干上干入翠微下趾連長薄芳露
浸紫莖秋風搖素萼雁起宵未央雲間月將落照梁桂
兮影徘徊承露盤兮光照灼壽陵之街走狐兔金卮玉
盃會銷鑠願奉蒲萄花為君實羽爵

左馮翊歌

陸厥

上林滴紫泉離宮赫千戶飛鳴亂鳬雁參差雜蘭杜比
翼獨未羣連葉誰為伍一物或難致無云泣易覩

扶風歌九首

劉琨

朝發廣莫門暮宿丹水山左手彎繁弱右手揮龍淵
顧瞻望宮闕俯仰御飛軒據鞍長歎息淚下如流泉
繫馬長松下發鞍高嶽頭冽冽悲風起泠泠澗水流
揮手長相謝哽咽不能言浮雲為我結飛鳥為我旋
去家日已遠安知存與亡慷慨窮林中抱膝獨摧藏

麋鹿遊我前，猴猿戲我側。資糧既乏盡，薇蕨安可食。
攬轡命徒侶，吟嘯絕巖中。君子道微矣，夫子故有窮。
惟昔李愬期，寄在匈奴庭。忠信反獲罪，漢武不見明。
我欲竟此曲，此曲悲且長。棄置勿重陳，陳重陳令人傷。

同前

鮑照

昨辭金華殿，今次雁門縣。寢卧握秦戈，棲息抱越箭。忍
悲別親知，行泣隨征傳。寒烟空徘徊，朝日乍舒卷。

秋風辭

漢武帝

漢武帝故事曰帝行幸河東祠后土顧視
帝京忻然中流與羣臣飲讌帝歡甚乃自
作秋風辭

秋風起兮白雲飛草木黃落兮雁南歸
蘭有秀兮菊有芳懷佳人兮不能忘
汎樓船兮濟汾河橫中流兮揚素
波簫鼓鳴兮發櫂歌歡樂極兮哀情多少
壯幾時兮奈老何

衛皇后歌

漢書曰衛子夫為皇后弟青貴震天下天下歌之按外戚傳衛子夫為平陽主謳者武帝被霸上還過平陽主既飲謳者進帝獨說子夫帝起更衣子夫侍尚衣軒中得幸平陽主因奏子夫送入宮是為衛皇后生男無喜生女無怒獨不見衛子夫霸天下

李延年歌

漢書外戚傳曰李延年性知音善歌舞武

帝愛之嘗侍上起舞而歌延年後為協律都尉

北方有佳人絕世而獨立一顧傾人城再顧傾人國寧不知傾城與傾國佳人難再得

李夫人歌

漢武帝

漢書外戚傳曰孝武李夫人本以倡進初武帝愛其兄延年平陽主因言延年有女弟帝乃召見之實妙麗善舞由是得幸夫

人少而早卒帝思念不已方士齊人少翁
言能致其神迺夜張燈燭設帷帳陳酒肉
而令帝居他帳遙望見好女如李夫人之
貌還幄坐而步又不得就視帝愈益相思
悲感為作詩令樂府諸音家弦歌之
是邪非邪立而望之偏何姍姍其來遲

同前

李商隱

一帶不結心兩股方安髻慙愧白芳人月沒教星替

刺結茱萸枝多擘秋蓮的獨自有波光
綵囊盛不得結
蠻絲繫條脫妍眼和香眉壽宮不惜鑄南人柔腸早被
秋波割清澄有餘幽素香鰥魚渴鳳真珠房不知瘦骨
類冰井更許夜簾通曉霜土花漠碧雲忙忙黃河欲盡
天蒼黃

同前

李賀

紫皇宮殿重重開夫人飛入瓊瑤臺
綠香繡帳何時歇
青雲無光宮水咽
翩聯桂花墜秋月孤鸞驚啼商絲發

紅壁闌珊懸佩璫歌臺小妓遙相望玉蟾滴水雞人唱
露華蘭葉參差光

同前

鮑溶

璫闌羽帳華燭陳方士夜降夫人神歲華半露芙蓉色
窈窕將期環珮身麗如三五月可望難親近嘖黛含屏
竟不言春思秋怨誰能問欲求巧笑如生時歌塵在空
瑟銜絲神來未及夢相見帝比初亡心更悲愛之欲其
生又死東流萬代無回水宮漏丁丁夜向晨烟銷霧散

愁方生

同前

張祐

延年不語望三星莫說夫人上涕零爭奈世間惆悵在
甘泉宮夜看圖形

李夫人及貴人歌

陸厥

屬車桂席塵豹尾香烟滅彤殿向靡蕪青蒲復萎絕坐
萎絕對靡蕪臨丹階泣椒塗寡鶴羈雌飛且止雕梁翠
壁網蜘蛛洞房明月夜對此淚如珠

未央才人歌

庾肩吾

從來守未央轉欲訝春芳
朝風凌日色夜月奪燈光
相逢儻游豫暫為卷衣裳

中山孺子妾歌二首

陸厥

漢書曰詔賜中山靖王子噲及孺子妾冰
未央才人歌詩四篇如淳曰孺子幼少稱
孺子妾宮人也顏師古曰孺子王妾之有
品號者妾王之衆妾也冰其名才人天子

內官按此謂以歌詩賜中山王及孺子妾
未央才人等爾累言之故云及也而陸厥
作歌乃謂之中山孺子妾夫之遠矣藝文
志又曰臨江王及愁思節士歌詩四篇李
夫人及幸貴人歌詩三篇亦皆累辭也
未央才人中山孺子一笑傾城一顧傾市傾城不自美
傾市復為容願把陵陽袖披雲望九重

如姬寢卧內班婕

一作妾

坐同車洪波陪飲帳林光宴秦

餘歲算寒飈及秋水落芙蓉子瑕矯後駕安陵泣前魚
賤妾終已矣一作賤妾思已畢君子定焉如

同前

李白

中山孺子妾特以色見珍雖不如延年妹亦是當時絕
世人桃李出深井花豔驚上春一貴復一賤關天豈由
身芙蓉老秋霜團扇羞網塵戚姬髡入春市萬古共
悲辛

臨江王節士歌

陸厥

木葉下江波連秋月照浦雲歇山秋思不可裁復帶秋
風來秋風來已寒白露驚羅紈節士慷慨髮衝冠彎弓
挂若木長劍竦雲端

同前

李白

洞庭白波木葉稀驚鴻始入吳王飛吳雲寒驚鴻苦風
號沙宿瀟湘浦節士感秋淚如雨白日當天心照之可
以事明主壯士憤雄風生安得倚天劍跨海斬長鯨

行幸甘泉宮

梁簡文帝

漢書曰武帝太始三年正月行幸甘泉宮
成帝永始四年正月行幸甘泉揚雄甘泉
賦曰廼命羣僚歷吉日協靈辰星陳而天
行乘輿登夫鳳凰兮而翳華芝駟蒼螭兮
六素虬劉歆甘泉宮賦曰軼陵陰之地室
過陽谷之秋城回天門而鳳舉躡黃帝之
明庭冠高山而為居乘崑崙而為宮王褒
甘泉宮頌曰甘泉山天下顯敞之名處也

前接大荆後臨北極左撫仁鄉右望素域
其為宮室也仍截薛而為觀攘抗岸以為
階覽除閣之麗美覺堂殿之巍巍按梁劉
孝威歌辭云避暑甘泉宮殿與上之回同
意云

雉歸海水寂裘來重譯通吉行五十里隨處宿離宮鼓
聲恒入地塵飛上暗空赦書隨豹尾太史逐相風銅鳴
周國旒旗曳楚雲虹倖臣射覆罷騎新歌終終董桃拜

金紫賢妻侍禁中不羨神仙侶排烟逐駕鴻

同前

劉孝威

漢家迎夏畢避暑甘泉宮機車鳴里鼓駟馬駕相風校

尉烏丸

一作桓

騎待制樓煩宮

一作東

後旌遊五柞前茹度

九峻才人豹尾內御酒屬車中輦回百子閣扇動七輪

風鳴鍾休衛士披圖召後宮材官促校獵秋來

一作涼秋

戲

射熊

烏孫公主歌

漢書西域傳曰武帝元封中遣江都王建
女細君為公主以妻烏孫王昆莫公主至
其國自治宮室居歲時一再與昆莫會置
酒飲食昆莫年老言語不通公主悲乃自
作歌

吾家嫁我兮天一方遠託異國兮烏孫王窮廬為室兮
旃為牆以肉為食兮酪為漿居常土思兮心內傷願為
黃鶴兮歸故鄉

匈奴歌

十道志曰焉支祁連二山皆美水草匈奴
失之乃作此歌漢書曰元狩二年春霍去
病將萬騎出隴西討匈奴過焉支山千有
餘里其夏又攻祁連山捕首虜甚多祁連
山即天山匈奴呼天為祁連故曰祁連山
焉支山即燕支山也

失我焉支山令我婦女無顏色
失我祁連山使我六畜

不蕃息

驪駒歌

古辭

漢書儒林曰王式除為博士既至舍中會
諸大夫共持酒肉勞式皆注意高仰之博
士江公心嫉式謂歌吹諸生曰歌驪駒式
曰聞之於師客歌驪駒主人歌客毋庸歸
今日諸君為主人日尚早未可也驪駒者
客欲去歌之故式以為言也

驪駒在門僕夫具存驪駒在路僕夫整駕

雜離歌

晨行梓道中梓葉相切磨與中別交中繡如新縑羅裂
之有餘絲吐之無還期

瓠子歌二首

西漢武帝

史記河渠書曰漢武帝既封禪乃使汲仁
郭昌發卒數萬人塞瓠子決河於是天子
已用事萬里沙還自臨決河沈白馬玉璧

令羣臣從官自將軍已下皆負薪寘決河
是時東郡以故薪柴少而下淇園之竹以
為楫天子既臨河決悼功之不成乃作歌

二章於是卒塞瓠子築宮其上曰宣房宮

瓠子決兮將奈何浩浩洋洋兮慮殫為河殫為河兮地
不得寧功無已時兮吾山平吾山平兮鉅野溢魚弗鬱
兮柏冬日正道弛兮離常流蛟龍騁兮方遠遊歸舊川
兮神哉沛不封禪兮安一作焉知外為我謂河伯兮何不

仁泛濫不止兮愁吾人鬻桑浮兮淮泗滿久不反兮水
維緩

河湯湯兮激潺湲北渡回兮迅流難舉長艾兮湛美玉
河伯許兮薪不屬薪不屬兮衛人罪燒蕭條兮噫乎何
以禦水隕林竹兮捷石菑宣防塞兮萬福來

李陵歌

漢書曰昭帝即位數年匈奴與漢和親漢
使求蘇武等單于許武還李陵置酒賀武

曰異域之人一別長絕因起舞而歌陵泣
下數行遂與訣

徑萬里兮度沙漠為君將兮奮匈奴路窮絕兮天刃摧
士衆滅兮名已隕老母已死雖報恩將安歸

廣川王歌二首

漢書曰廣川王去繆王齊太子也有幸姬
王昭平王地餘許以為后後皆殺之更立
陽城昭信為后幸姬陶望卿為脩靡夫人

主繒帛崔脩成為明貞夫人主永巷昭信
復譖望卿疑有姦去以故不愛望卿後與
昭信等飲諸婢皆侍去為望卿作歌曰背
尊章使美人相和歌之後昭信譖殺望卿
欲擅愛曰王使明貞夫人主諸姬淫亂難
禁請閉諸姬舍門無令出教使其大婢為
僕射主永巷盡封閉諸舍上齋於后非大
置酒召不得見去憐之為作歌曰愁莫愁

令昭信聲鼓為節以教諸姬歌之按西京

雜記作廣川王去疾

背尊章嫖以忽謀屈奇起自絕行周流自生患諒非望
今誰怨

愁莫愁生無聊心重結意不舒內弗懣憂哀積上不見
天生何益日雀隕時不再願棄軀死無悔

牢石歌

漢書佞幸傳曰元帝時石顯為中書令與

僕射牢梁時府五鹿充宗結為黨友諸附
倚者皆得寵位而民歌之言其兼官據勢
也

牢邪石邪五鹿客邪印何累累綬若若邪

黃鵠歌

漢昭帝

西京雜記曰始元元年黃鵠下太液池帝
為此歌按清商吳聲曲有黃鵠歌與此不
同

黃鵠飛兮下建章羽肅肅兮行踰踰金為衣兮菊為裳
咬嚼荷行出入蒹葭自顧菲薄愧爾嘉祥

黃門倡歌

漢書禮樂志曰成帝時鄭聲尤甚黃門名
倡丙疆景武之屬富顯於世隋書樂志曰
漢樂有黃門鼓吹天子宴羣臣之所用也
佳人俱絕世握手上春樓點黛方初月縫裙學石榴君
王入朝罷爭競理衣裘

樂府詩集卷八十四

欽定四庫全書

樂府詩集卷八十五

宋 郭茂倩 輯

雜歌謠辭

歌辭

五侯歌

漢書曰成帝河平二年悉封舅大將軍王
鳳庶弟譚為河阿侯商成都侯立紅陽侯

根曲陽侯逢時高平侯五人同日封故世
謂之五侯時五侯羣弟爭爲奢侈後庭姬
妾各數十人羅鍾磬舞鄭女作優倡狗馬
馳逐大治第室起土山漸臺洞門高廊閣
道連屬彌望百姓歌之言其奢僭如此按
傳稱成都侯穿長安城引內澧水注第中
大陂曲陽侯第園中土山漸臺類白虎殿
則穿城引水非曲陽與歌辭不同高都外

杜皆長安里名

五侯初起曲陽最怒壞決高都連竟外杜土山漸臺西
白虎

上郡歌

漢書曰成帝時馮野王為上郡太守其後
弟立亦自五原徙西河上郡立居職公廉
治行略與野王相似而多知有恩貸好為
條教吏民嘉美野王立相代為太守乃歌

之云

大馮君小馮君兄弟繼踵相因循聰明賢知惠吏民政
如魯衛德化鈞周公康叔猶二君

燕王歌

漢書曰燕刺王旦武帝第四子也昭帝時
謀事不成妖祥數見燕倉知其謀告之由
是發覺王憂慙置酒萬載宮會賓客羣臣
妃妾坐飲王自歌華容夫人起舞坐者皆

泣王遂自殺

歸空城兮狗不吠雞不鳴橫術何廣廣兮固知國中之無人

華容夫人歌

髮紛紛兮寘渠骨籍籍兮亾居母求死子兮妻求死夫
裴回兩渠間兮君子獨一作將安居

廣陵王歌

漢書曰廣陵厲王胥武帝第五子也昭帝

時胥見帝年少無子有覬欲心迎女巫李
女湏使下神祝詛宣帝即位祝詛事發覺
胥置酒顯陽殿召太子霸及子女董訾胡
生等夜飲使所幸八子郭昭君家人子趙
左君等鼓瑟歌舞王自歌左右悉涕泣奏
酒至雞鳴時罷

欲久生兮無終長不樂兮安窮奉天期兮不得湏臾千
里馬兮駐待路黃泉下兮幽深人生要死何為苦心何

用為樂心所喜出入無悰為樂丞

一作極

蒿里召兮郭門

閔死不得取代庸身自逝

鮑司隸歌

樂府廣題曰列異傳云鮑宣宣子永永子
昱三世皆為司隸而乘一驄馬京師人歌
之

鮑氏驄三人司隸再入公馬雖瘦行步工

五噫歌

三輔決錄曰梁鴻東出關過京師作五噫之歌肅宗聞而悲之求鴻不得

陟彼北邙兮噫顧瞻帝京兮噫宮闕崔巍兮噫民之劬勞兮噫遼遼未央兮噫

董少平歌

後漢書曰董宣字少平光武時為洛陽令搏擊豪彊京師號為卧虎而歌之云

枹鼓不鳴董少平

張君歌

後漢書曰張堪為漁陽太守捕擊姦猾賞
罰必信吏民皆樂為用乃於狐奴開稻田
八千餘頃勸民耕種以致殷富百姓歌之
桑無附枝麥穗兩歧張君為政樂不可支

廉叔度歌

後漢書曰廉范字叔度建初中為蜀郡太
守成都民物豐衍邑宇逼側舊制禁民夜

作以防火災而更相隱蔽燒者曰屬范乃
毀削先令但嚴使儲水而已百姓為便乃
歌之云

廉叔度來何暮不禁火民安作平生無襦今五袴

范史雲歌

後漢書曰范冉字史雲桓帝時為萊蕪長
遭母喪不到官後於梁沛間徒行敝服賣
卜於市遭黨人禁錮遂推鹿車載妻子据

拾自資或寓息客廬或依宿樹陰如此十
餘年乃治草堂而居焉所止單漏有時絕
粒閤里歌之及黨禁解為三府所辟乃應
司空命冉或作丹

甌中生塵范史雲釜中生魚范萊蕪

岑君歌

後漢書曰岑熙為魏郡太守招聘隱逸與
參政事無為而化視事二年與人歌之

卷八十五
我有枳棘岑君伐之我有蝨賊岑君遏之狗吠不驚足
下生鼃含哺鼓腹焉知凶災我喜我生獨丁斯時美矣
岑君於戲休茲

皇甫嵩歌

後漢書曰皇甫嵩為冀州牧請冀州一年
田租以贍飢民百姓歌之

天下大亂兮市為墟母不保子兮妻失夫賴得皇甫兮
復安居

郭喬卿歌

後漢書曰郭賀字喬卿建武中為尚書令
在職六年拜荊州刺史到官有殊政百姓
歌之顯宗巡狩到南陽特見嗟賞賜以三
公之服敕行部去襜帷使百姓見其容服
以章有德

嚴德仁明郭喬卿中正朝廷上下平

賈父歌

後漢書曰中平元年交趾屯兵執刺史及
合浦太守自稱柱天將軍靈帝敕三府精
選能吏有司舉賈琮為交趾刺史琮到部
即移書告示各使安其資業百姓為之歌
賈父來晚使我先反今見清平吏不敢飯

朱暉歌

東觀漢記曰朱暉字文季再遷臨淮太守
吏民畏愛而為之歌

彊直自遂南陽朱季吏畏其威民懷其惠

劉君歌

後漢書曰劉陶舉孝廉除順陽長縣多姦
猾陶到官按發若神以病免吏民思而歌
之

邑然不樂思我劉君何時復來安此下民

洛陽令歌

長沙耆舊傳曰祝良字石卿為洛陽令歲

時亢旱天子祈雨不得良乃褻身階庭告
誠引罪自晨至中紫雲沓起甘雨登降人
為之歌

天久不雨蒸人失所天王自出祝令特苦精符感應滂
沱下雨

滎陽令歌

殷氏世傳曰殷褒為滎陽令廣築學館會
集朋徒民知禮讓乃歌之云

榮陽令有異政脩立學校人易性令我子弟恥訟爭

徐聖通歌

會稽典錄曰徐宏字聖通為汝陰令誅鉏姦桀道不拾遺民乃歌之

徐聖通政無雙平刑罰姦宄空

王世容歌

吳錄曰王鐔字世容為武城令民服德化宿惡奔迸父老歌之

金文四庫
卷八十五
王世容政無雙省徭役盜賊空

晉高祖歌

晉陽秋曰高祖伐公孫淵過故鄉賜牛酒
穀帛會父老故舊飲讌高祖作歌

天地開闢日月重光遭逢際會奉辭遐方將掃逋穢還
過故鄉肅清萬里總齊八荒告誠歸老待罪武陽

徐州歌

晉書曰王祥隱居廬江三十餘年不應州

郡之命後徐州刺史呂虔檄為別駕固辭
不受弟覽為具車牛虔乃召祥委以州事
于時寇盜充斥祥率勵兵士頻討破之州
界清靜政化大行時人歌之

海沂之康實賴王祥邦國不空別駕之功

東哲歌

晉書曰東哲元平元城人太康中郡界大
旱哲為邑人請雨三日而雨注眾謂哲誠

感而為作歌

東先生通神明請天三日甘雨零我黍以育我稷以生
何以疇之報東長生

豫州歌

晉書曰祖逖為豫州刺史躬自儉約督課
農桑克已務施不畜資產子弟耕耘負擔
樵薪又收葬枯骨為之祭醊百姓感悅嘗
置酒大會耆老中坐流涕曰吾等老矣更

得父母死將何恨乃作此歌其得人心如此

幸哉遺黎免俘虜三辰既朗遇慈父玄酒忘勞甘瓠脯
何以詠思歌且舞

應詹歌

晉書曰王澄為荊州牧應詹督南平天門
武陵三郡軍事天下大亂詹境獨全百姓
歌之

亂離既晉殆為灰朽僥倖之運賴茲應后歲寒不凋孤
境獨守拯我塗炭惠隆邱阜潤同江海恩猶父母

吳人歌

晉書曰鄧攸為吳郡守載米之官俸祿無
所受唯飲吳水而已及去郡百姓數千人
留牽攸船不得進乃以小舟夜中發去吳
人歌之

純如打五鼓雞鳴天欲曙鄧侯挽不來謝令推不去

并州歌

樂府廣題曰晉汲桑力能扛鼎呼吸聞數
里殘忍少恩六月盛暑重裘累裊使人扇
之忽不清涼便斬扇者并州大姓田蘭薄
盛斬於平原士女慶賀奔走道路而歌之
士為將軍何可羞六月重茵披豹裘不識寒暑斷他頭
雄兒田蘭為報仇中夜斬首謝并州

隴上歌

晉書載記曰劉曜圍陳安于隴城安敗南走陝中曜使將軍平先邱中伯率勁騎追安安與壯士十餘騎於陝中格戰安左手奮七尺大刀右手執丈八蛇矛近交則刀矛俱發輒害五六遠則雙帶鞬服左右馳射而走平先亦壯健絕人與安搏戰三交奪其蛇矛而退遂追斬于澗曲安善於撫接吉凶夷險與衆同之及其死隴上為之

歌曜聞而嘉傷命樂府歌之

隴上壯士

一作健兒

有陳安軀幹雖小腹中寬愛養將士同

心肝驕驄父馬鐵瑕鞍七尺大刀奮如湍丈八蛇矛左
右盤十盪十決無當前戰始三交失蛇矛棄我驕驄竄
巖幽為我外援而懸頭西流之水東流河一去不還奈
子何

司馬將軍歌

李白

司馬將軍歌李白所作以代隴上健兒陳

安

狂風吹古月竊弄章華臺北落明星動光彩南征猛將
如雲雷手中雷曳倚天劍直斬長鯨海水開我見樓船
壯心目頗似龍驤下三蜀揚兵習戰張虎旗江中白浪
如銀屋身居玉帳臨河魁紫髯若戟冠崔巍細柳開營
揖天子始知灞上為嬰孩羌笛橫吹阿驪回向月樓中
吹落梅將軍自起舞長劍壯士呼聲動九垓功成獻凱
見明主丹青畫像麒麟臺

鄭櫻桃歌

李頎

晉書載記曰石季龍勒之從子也性殘忍
勒為聘將軍郭榮之妹為妻季龍寵惑優
僮鄭櫻桃而殺郭氏更納清河崔氏櫻桃
又譖而殺之櫻桃美麗擅寵宮掖樂府由
是有鄭櫻桃歌

石季龍僭天祿擅雄豪美人姓鄭名櫻桃櫻桃美顏香
且澤娥娥侍寢專宮掖後庭卷衣三萬人翠著清鏡不

得親官軍

一作庫

女騎一千匹繁花照耀漳河春織成花

映紅綸巾紅旗掣曳鹵簿新鳴輦走馬接飛鳥銅鈇琴
瑟隨去塵鳳陽重門如意館百尺金梯倚銀漢自言富
貴不可量女為公主男為王赤花雙簾珊瑚床盤龍斗
帳琥珀光淫昏偽位神所惡滅石者陵終不誤鄴城蒼
蒼白露微世事翻覆黃雲飛

襄陽童兒歌

晉書曰山簡永嘉中鎮襄陽時四方寇亂

朝野危懼簡優游卒歲唯酒是耽諸習氏
荆土豪族有佳園池簡每出嬉遊多之池
上置酒輒醉名之曰高陽池於是童兒皆
歌之有葛彊者簡之愛將家於并州故歌
云舉鞭向葛彊何如并州兒

山公出何許往至高陽池日夕倒載歸酩酊無所知時
時能騎馬倒著白接羅舉鞭向葛彊何如并州兒

襄陽歌

李白

落日欲沒峴山西倒著接羅花下迷襄陽小兒齊拍手
攔街爭唱白銅鞮傍人借問笑何事笑殺山公醉似泥
鸕鷀杓鸚鵡杯百年三萬六千日一日須傾三百杯遙
看漢水鴨頭綠恰似蒲萄初醱醅此江若變作春酒壘
麴便築糟邱臺千金駿馬換少妾醉坐雕鞍歌落梅車
傍側挂一壺酒鳳笙龍管行相催咸陽市上歎黃犬何
如月下傾金罍君不見晉朝羊公一片石一作一片古碑材龜
龍剝落生莓苔淚亦不能為之墮心亦不能為之哀誰

能憂彼身後事金鳬銀鴨葬死灰清風朗月不用一錢
買玉山自倒非人推舒州杓力士檔李白與爾同死生
襄王雲雨今安在江水東流猿夜聲

襄陽曲四首

李白

襄陽行樂處歌舞白銅鞮江城回渌水花月使人迷
山公醉酒時酩酊襄陽下頭上白接羅倒著還騎馬
峴山臨漢江水渌沙如雪

一作水色
如霜雪

上有墮淚碑青苔

久磨滅

且醉習家池莫看墮淚碑山公欲上馬笑殺襄陽兒

蘇小小歌

古辭

一曰錢塘蘇小小歌樂府廣題曰蘇小小
錢塘名倡也蓋南齊時人西陵在錢塘江
之西歌云西陵松柏下是也

我乘油壁車郎乘青驄馬何處結同心西陵松柏下

同前

李賀

幽蘭露如啼眼無物結同心烟花不堪翦草如茵松如

蓋風為裳水為佩
油壁車久相待
冷翠燭勞光彩
西陵下風吹雨

同前

溫庭筠

買蓮莫破券
買酒莫解金
酒裏春容抱離恨
水中蓮子懷芳心
吳宮女兒腰似束
家在錢塘小江曲
一自檀郎逐便風
門前春水年年綠

同前三首

張祜

車綸不可遮
馬足不可絆
長怨十字街
使郎心四散

新人千里去故人千里來
剪刀橫眼底方覺淚難裁
登山不愁峻涉海不愁深
中擘庭前棗教郎見赤心

河中之水歌

梁武帝

河中之水向東流
洛陽女兒名莫愁
莫愁十三能織綺
十四採桑南陌頭
十五嫁為盧郎婦
十六生兒似阿侯
盧家蘭室桂為梁
中有鬱金蘇合香
頭上金釵十二行
足下絲履五文章
珊瑚挂鏡爛生光

一作生輝光

平頭奴子

擎履箱人生富貴何所望
恨不早嫁東家王

樂府詩集卷八十五

欽定四庫全書

樂府詩集卷八十六

宋 郭茂倩 輯

新歌謠辭

歌辭

中興歌十首

鮑照

千冬逢一春萬夜視朝日生年值中興歡起百年畢
中興太平運化清四海樂祥景照玉臺紫烟遊鳳閣

碧樓含夜月紫殿爭朝光彩墀散蘭麝風起自生芳
白日照前窗玲瓏綺羅中美人掩輕扇含思歌春風
三五容色滿四五妙華歇已輸春日歡分隨秋光沒
北出湖邊戲前還苑中遊飛轂繞長松馳管逐波流
九月秋水清三月春花滋千金逐良日皆競中興時
窮泰已有分壽夭復屬天既見中興樂莫持憂自煎
襄陽是小地壽陽非帝城今日中興樂遙治在上京
梅花一時豔竹葉千年色願君松柏心採照無窮極

勞歌二首

伍緝之

莊子曰勞我以生佚我以老息我以死韓
詩曰飢者歌食勞者歌事若伍緝之云述
遭已窮極又云居身苦且危則勞生可知
矣

幼童輕歲月謂言可久長一朝見零悴難息向秋霜述
遭已窮極疾病復不康每恐先朝露不見白日光庶及
盛年時暫遂情所望吉辰既乖越來期眇未央促促歲

月盡窮年空怨

一作悲傷

女蘿依附松終已冠高枝浮萍生託水至死不枯萎傷
哉抱關士獨無松與期月色似冬草居身苦且危幽生
重泉下窮年冰與澌多謝負郭生無所事六奇勞為社
下宰時無魏無知

同前

蕭撝

百年能幾許公事罷平生寄言任立政誰憐李少卿

白日歌

張融

張融序歌曰懸象著明莫大於日月而彼
日月不能不謝固知無準衰為盛之終盛
乃衰之始故為白日歌

白日白日舒天照暉數窮則盡盛滿而衰

雲歌

王臺卿

玉雲初度色金風送影來全生疑魄暗半去月時開欲
知無處所一為上陽臺

一旦歌

一旦被頭痛避頭還著牀自無親伴侶誰當給水漿匍匐入山院正逢虎與狼對虎低頭啼垂淚淚千行

淫豫歌二首

鄴道元水經注曰白帝山城水門之西江中有孤石名淫豫石水冬出二十餘丈夏則沒亦有裁出焉江水東逕廣峽溪乃三峽首之也峽中有瞿塘黃龕二灘夏水回復泓沂所忌十道志曰淫豫石與城郭門

外石潛通蜀人往燒火伏石則淫豫邊沸
國史補曰蜀之三峽最號峻急四月五月
尤險故行者歌之淫或作豔預或作豫

豔預大如馬瞿塘不可下

豔預大如牛瞿塘不可流

同前

梁簡文帝

淫預大如服瞿塘不可觸金沙浮轉多桂浦忌經過

巴東三峽歌二首

酈道元水經注曰巴東三峽謂廣溪峽巫
峽西陵峽也三峽七百里中兩岸連山略
無關處重巖疊嶂隱蔽天日非亭午夜分
不見日月其中有灘名曰黃牛江湍紆回
信宿猶見故行者謠曰朝發黃牛莫宿黃
牛三日三莫黃牛如故宜都山川記曰自
黃牛灘東入西陵界至峽口一百許里山
水紆曲林木高茂猿鳴至清山谷傳響冷

冷不絕行者聞之莫不懷土故漁者歌云

巴東三峽巫峽長猿鳴三聲淚沾裳

巴東三峽猿鳴悲猿鳴三聲淚沾衣

挾琴歌

范靜妻沈氏

逶迤起塵唱宛轉遶梁聲調弦可以進蛾眉畫未成

挾瑟歌

魏收

春風宛轉入曲房兼送小苑百花香白馬金鞍去未返
紅妝玉筯下成行

同前

陸龜蒙

挾瑟為君撫君嫌聲太古寥寥倚浪絲
嘹嘹沈湘語賴有秋風知清冷吹玉柱

鄱陽歌二首

南史曰梁陸襄為鄱陽內史大同初郡人
鮮于琮結司徒殺廣晉令王筠有衆萬餘
人將出攻郡襄先已率人吏脩城隍為備
及賊至破之生獲琮時鄱郡守宰案其黨

與皆不得實或有善人盡室罹禍唯襄郡
枉直無濫民乃作歌又有彭李二家因忿
爭相誣告襄引入內室不加責誚但和言
解喻之二人感恩深自悔咎乃為設酒食
令其盡歡酒罷同載而還因相親厚民因

歌之

鮮于抄後善惡分人無橫死賴陸君

陸君政無怨家鬪既罷讎共車

北軍歌

南史曰梁臨川靜惠王宏為揚州刺史天
監中武帝詔都督諸軍侵魏宏以帝之介
弟所領皆器甲精新軍容甚盛北人以為
百數十年所未之有軍次洛口前軍尅梁
城諸將欲乘勝深入宏聞魏援近畏懦不
敢進召諸將欲議旋師呂僧珍曰知難而
退不亦善乎停軍不進魏人知其不武遺

以巾幘北軍乃歌之歌云韋武謂韋叡也
不畏蕭娘與呂姥但畏合肥有韋武

雍州歌

南史曰梁南平王偉子恪為雍州刺史年
少未閑庶務委之羣下百姓每通一辭數
處輸錢方得聞徹賓客有江仲舉蔡遂王
臺卿庾仲容四人俱被接遇並有蓄積民
間歌之後建武帝帝因接末句云

江千萬蔡五百王新車庾大宅主人憤憤不知客

始興王歌

南史曰梁始興忠武王憺為都督荊州刺史時天監初軍旅之後公私匱乏憺厲精為政廣闢屯田減省力役供其窮困辭訟者皆立待符教決於俄頃曹無留事下無滯獄後徵還朝而民歌之荊土方言謂父為爹故歌云人之爹也

始興王人之爹赴人急如水火何時復來哺乳我

夏侯歌

梁書曰夏侯夔為豫州刺史於蒼陵立堰
溉田千餘頃境內賴之夔兄亶先居此任
兄弟並有恩惠百姓歌之夔在州七年遠
近多親附

我之有州賴彼夏侯前兄後弟布政優優

咸陽王歌

北史曰後魏咸陽王禧謀逆伏誅後宮人
為之歌其歌遂流於江表

可憐咸陽王奈何作事悞金牀玉几不能眠
夜起踏霜露洛水湛湛彌岸長行人那得度

鄭公歌

北史曰後魏鄭述祖為兗州刺史有人入
市盜布其父執之以歸述祖述祖特原之
自是境內無盜先是述祖之父道昭亦嘗

為兗州刺史故百姓歌之

大鄭公小鄭公相去五十載風教尚猶同

裴公歌

北史曰裴俠為河北郡守躬履儉素愛民
如子郡舊有漁獵夫三十人以供郡守俠
曰以口腹役人吾所不為也悉罷之又有
丁三十人供郡守役俠亦罷之不以入私
並收庸為市官馬歲時既積馬遂成羣去

職之日一無所取民歌之云

肥鮮不食丁庸不取裴公貞惠為世規矩

長白山歌

北史曰來整榮國公護之子也尤驍勇善
撫御討擊羣賊所向皆捷諸賊歌之

長白山頭百戰場十五五把長槍不畏官軍千萬乘
只怕榮公第六郎

敕勒歌

樂府廣題曰北齊神武攻周玉壁士卒死者十四五神武恚憤疾發周王卜令曰高歡鼠子親犯玉壁劒弩一發元凶自斃神武聞之勉坐以安士衆悉引諸貴使斛律金唱敕勒神武自和之其歌本鮮卑語易為齊言故其句長短不齊

敕勒川陰山下天似穹廬籠蓋四野天蒼蒼野茫茫風吹草底見牛羊

同前

溫庭筠

敕勒金墮壁陰山無歲華帳外風飄雪營前月照沙
羌兒吹玉管胡姬踏錦花却笑江南客梅落不歸家

東征歌

王通

杜淹文中子世家曰隋仁壽中文中子西
遊長安兒文帝奏太平十有二策帝下其
議於公卿公卿不悅文中子知謀之不用
作東征之歌而歸帝聞而再徵之不至

我思國家兮遠遊京畿忽逢帝王兮降禮布衣遂懷古
人之心兮將興太平之基時異事變兮志乖願違吁嗟
道之不行兮垂翅東歸皇之不斷兮將身西飛

薛將軍歌

唐書曰高宗時薛仁貴領兵擊九姓突厥
於天山時九姓有衆十餘萬令驍健數十
人逆來挑戰仁貴發三矢射殺三人自餘
一時下馬請降仁貴恐為後患並坑殺之

九姓自此衰弱不復更為邊患於是軍中

歌之

將軍三箭定天山戰士長歌入漢關

顏有道歌

唐書曰顏遡秦師古叔父武德初為廉州刺史時劉黑闥初平人多以彊暴寡禮風俗未安遡秦撫恤境內敬讓大行邑里歌之高祖璽書勉勞焉

廉州顏有道姓行同莊老愛人如赤子不殺非時草

新河歌

唐書曰薛大鼎貞觀中為滄州刺史州界
有無棣河隋末填廢大鼎奏開之引魚鹽
於海百姓歌之

新河得通舟楫利直達滄海魚鹽至昔日徒行今結駟
美哉薛公德滂被

田使君歌

唐書曰田仁會永徽州為郢州刺史屬時
早仁會自曝祈禱竟獲甘澤其年大稔百
姓歌之

父母育我田使君精誠為人上天聞田中致雨山出雲
倉廩既實禮義申但願常在不憂貧

黃麀歌

唐書五行志曰如意初里中歌黃麀後契
丹李盡忠孫萬榮叛陷營州則天令總管

曹仁師王孝傑等將兵百萬討之大敗於
硤石黃麋谷而死朝廷嘉其忠為造此曲
後亦為舞曲

黃麋黃麋草裏藏弓射爾傷

得休歌

唐書曰天寶初韋堅為陝郡太守水陸轉
運使於長安城東滙水傷穿廣運潭以通
吳會數十郡舟楫若廣陵郡船即堆積廣

陵所出錦鏡銅器餘郡皆然舟人大笠寬
衫芒履如吳楚之製先是民間戲唱得休
歌至開元末田間秀上言見玄元皇帝云
有寶符在陝州桃林縣古關令尹喜宅遣
中使求得之以為殊祥改縣為靈寶及堅
鑿新潭成又致揚州銅器陝縣尉崔成甫
乃翻此詞為得寶歌集兩縣官伎女子倡
之成甫又作歌詞十章自衣缺胯綠衫錦

半臂偏袒膊紅抹額於第一船作號頭唱
之和者女子百人皆鮮服靚妝齊聲接影
鼓笛胡部以應之樂府雜錄曰得寶歌一
曰得寶子又曰得鞞子明星初得太真妃
喜而謂後宮曰予得楊氏如得至寶樂府
遂作此曲二說不同

得休紇那也紇囊得休那潭裏船車鬧揚州銅器多三
郎當殿坐聽唱得休歌

得寶歌

得寶弘農野弘農得寶那潭裏船車開揚州銅器多三
郎當殿坐聽唱得寶歌

黃臺瓜辭

唐章懷太子

唐書曰武后生四子長曰孝敬皇帝弘為
太子監國而仁明孝悌武后方圖臨朝乃
殺孝敬立雍王賢為太子賢曰懷憂惕知
必不保全無由敢言乃作黃臺瓜辭命樂

工歌之冀武后聞之感悟後終為武后所

逐死於黔中

一作高
宗武后

種瓜黃臺下瓜熟子離離一摘使瓜好再摘令瓜稀三
摘尚自可摘絕抱蔓歸

古歌

沈佺期


落葉流風向玉臺夜寒秋思洞房開水精簾外金波下
雲母窗前銀漢迴玉階陰陰苔蘚色君王履綦難再得
璇閨窈窕秋夜長繡戶徘徊秋月光燕姬綵帳芙蓉色

秦子金爐蘭麝香
北斗七星橫
夜半清歌一曲斷
君腸

同前二首

薛維翰

美人怨何深
含情倚金閣
不嘯復不語
紅淚雙雙落
美人閑紅燭
獨坐裁心錦
頻放剪刀聲
夜寒知未寢



樂府詩集卷八十六

欽定四庫全書

集部

樂府詩集卷八十七

詳校官庶吉士_臣柳邁祖

助教_臣常循覆勘

總校官知縣_臣繆琪

校對官編修_臣秦瀛

謄錄監生_臣孫承基

欽定四庫全書

樂府詩集卷八十七

宋 郭茂倩 輯

雜歌謠辭

歌辭

潁川歌

漢書曰灌夫不好文學喜任俠已然諾諸
所與交通無非豪傑大猾家累數千萬食

客日數十百人陂池田園宗族賓客為權
利橫潁川潁兒歌之

潁水清濯氏寧潁水濁濯氏族

庾公歌二首

晉書五行志曰庾亮初鎮武昌出至石頭
百姓於岸上歌之後連徵不入及薨還都
塋焉

庾公上武昌翩翩如飛鳥庾公還揚州白馬牽旒旒

庾公初上時翩翩如飛鳥庾公還揚州白馬牽流蘇

御路楊歌

宋書五行志曰晉海西公太和中民為此
歌白者金行馬者國族紫為奪正之色明
以紫間朱也海西公尋廢三子非海西子
並縊以馬韁死之明日南方獻甘露

青青御路楊白馬紫游韁汝非皇太子那得甘露漿

鳳凰歌

宋書五行志曰晉海西公生皇子百姓歌
之其歌甚美其旨甚微海西公不男使左
右向龍與內侍接生子以為已子

鳳凰生一雛天下莫不喜本言自馬駒今定成龍子

黃曇子歌

溫庭筠

晉書五行志曰桓石民為荊州百姓忽歌
黃曇子曲後石民死王忱為荊州之應黃
曇子王忱字也按橫吹曲李延年二十八

解有黃覃子不知與此同否凡歌辭考之
與事不合者但因其聲而作歌爾

參差綠蒲短搖艷雲

一作春

塘滿紅湫蕩融融鶯翁鷓鴣

暖萋芊小城路馬上脩蛾懶羅衫裊向風點粉金鸝卵

歷陽歌

晉書五行志曰庾楷鎮歷陽百姓歌之後
楷南奔桓玄為玄所殺

重羅黎重羅黎使君南上無還時

苻堅時長安歌

晉書載記曰苻堅既滅燕慕容沖姊偽清
河公主年十四有殊色堅納之寵冠後庭
沖年十二亦有龍陽之姿堅又幸之姊弟
專寵宮人莫進長安歌之咸懼為亂王猛
切諫堅乃出沖後竟為沖所敗

一雌復一雄雙飛入紫宮

王子年歌二首

南史曰齊太祖高皇帝諱道成姓蕭氏未
受命時王子年作此歌案穀中精細者稻
也即道也熟猶成也金刀劉字刈猶翦也
欲知其姓草肅肅穀中最細低頭熟鱗身甲體永興福
金刀利刃齊刈之

邯鄲郭公歌

樂府廣題曰北齊後主高緯雅好傀儡謂
之郭公時人戲為郭公歌及將敗果營邯

鄆高郭聲相近九十九末數也滕口鄧林
也大兒謂周帝太祖子也高岡後主姓也
雉雞類武成小字也後敗於鄧林盡如歌
言蓋詩妖也

邯鄲郭公九十九枝兩漸盡入滕口大兒緣高岡雉子
東南走不信吾言時當看歲在酉

邯鄲郭公辭

溫庭筠

金笳悲故曲玉座積深塵言是邯鄲伎不易鄴城人青

苔竟埋骨紅粉自傷神
唯有漳河柳還向舊營春

齊雲觀歌

隋書五行志曰陳後主造齊雲觀國人歌
之功未畢而為隋師所虜

齊雲觀寇來無際畔

周宣帝歌

隋書五行志曰周宣帝與宮人夜中連臂
蹋踑而歌

自知身命促把燭夜行遊

謠辭

黃澤辭

穆天子傳曰天子東遊于黃澤使宮樂謠

云

黃之隄其馬飲沙皇人威儀皇之澤其馬飲玉皇人壽

穀

白雲謠

穆天子謠曰天子觴西王母於瑤池之上
西王母為天子謠天子荅之

白雲在天山陵自出道里悠遠山川間之將子無死向
復能來

穆天子謠

予歸東土和治諸夏萬民平均吾顧見汝比及三年將
復而野

越謠歌

古辭

君乘車我帶笠他日相逢下車揖君檐登我跨馬他日相逢為君下

長安謠

漢書佞倖傳曰成帝初石顯與妻子徙歸故鄉其黨牢梁陳順皆免官諸所交結以顯為官皆廢罷少府五鹿充宗左遷玄菟太守御史中丞伊嘉為雁門都尉長安謠云

伊徙雁鹿徒兔去牢與陳實無價

城中謠

後漢書曰前世長安城中謠言改政移風
必有其本上之所好下必甚焉

城中好高髻四方高一尺城中好廣袖四方且半額城
中好大袖四方全匹帛

會稽童謠

後漢書曰張霸永元中為會稽太守時賊

未解郡界不寧乃移書開購明用信賞賊
遂束手歸附不煩士卒之力於是有童謡
棄我戟捐我矛盜賊盡吏皆休

二郡謡

後漢書曰汝南太守宗資任功曹范滂南
陽太守成瑨亦委功曹岑睞范滂字孟博
岑睞字公孝二郡為謡

汝南太守范孟博南陽宗資主畫諾南陽太守岑公孝

弘農成瑨但坐嘯

京兆謠

續漢書曰李燮拜京兆詔發西園錢燮上封事遂止不發吏民愛敬乃為此謠

我府君道教舉恩如春威如虎剛不吐弱不茹愛如母訓如父

後漢桓靈時謠

後漢書曰桓靈之世更相濫舉人為之謠

舉秀才不知書察孝廉父別居

吳謠

吳志曰周瑜少精意於音樂雖三爵之後
其有闕誤瑜必知之知之必顧故時人謠
云

曲有誤周郎顧

晉泰始中謠

晉書曰泰始中人為賈充等謠言亡魏而

成晉也

賈裴王亂紀綱王裴賈濟天下

閣道謠

晉書曰潘岳才名冠世為衆所疾後為河陽令而鬱鬱不得志時尚書僕射山濤領吏部王濟裴楷等並為帝所親遇岳內非之乃題閣道為謠

閣道東有大牛王濟鞅裴楷鞚和嶠刺促不得休

南土謠

王隱晉書曰杜預為鎮南大將軍都督荊
州諸軍事南土美而謠之

後世無叛由杜翁孰識智名與勇功

宋時謠

南史曰宋時用人乖實有謠云

上車不落為著作作體中何如作祕書

宋大明中謠

南史曰大明中有奚顯度者為員外散騎
侍郎孝武嘗使主領人功而苛虐無道動
加捶撻暑雨寒雪不聽暫休人不堪命或
自經死時建康縣考囚或用方材壓額及
踝脛故民間有此謠又相戲曰勿反顧付
奚度其暴酷如此

寧得建康壓額不能受奚度拍

山陰謠

南史曰丘仲孚為山陰令居職甚有聲稱
而百姓為此謠前世傳琰父子沈憲劉玄
明相繼宰山陰並有政績言仲孚皆過之
也

二傳沈劉不如一丘

梁時童謠

南史曰臨賀郡王正德性凶慝其後梁室
傾覆既由正德百姓至聞臨賀郡名亦不

欲道其惡之如是故有童謡

寧逢五虎入市不欲見臨賀父子

曲堤謡

北史曰宋世良為清河太守才識閑明尤
善政術郡東南有曲堤羣盜所萃世良施
八條之制盜奔它境而民為此謡

曲堤雖險賊何益但有宋公自屏跡

趙郡謡

北史曰後魏李孝伯父曾道武時為趙郡
太守令行禁止并州丁零數為山東害知
曾能得百姓死力不敢入境賊於常山界
得一死鹿賊長為趙郡地也責之還令送
鹿故處其見憚如此郡人為之謠

詐作趙郡鹿猶勝常山粟

北齊太上時童謠

千金買藥園中有矣蓉樹破家不分明蓮子隨它去

獨酌謠四首

陳後主

陳後主序曰齊人淳于髡善為十酒偶效
之作獨酌謠

獨酌謠獨酌且獨謠一酌豈陶暑二酌斷風飈三酌意
不暢四酌情無聊五酌孟易覆六酌懽欲調七酌累心
去八酌高志一作德起九酌忘物我十酌忽凌霄凌霄異

羽翼任致得飄飄寧學世人醉揚波去我遙爾非浮丘
伯安見王子喬

獨酌謠獨酌起中宵中宵照春月初花發春朝春花春
月正徘徊一罇一弦當夜開聊奏孫登曲仍斟畢卓杯
羅綺徒紛亂金翠轉遲回中心更如水凝志本同灰逍
遙自可樂世語世情哉

獨酌謠獨酌酒難消獨酌三兩盃弄曲兩三調調弦忽
未畢忽值出房朝更似遊春苑還如逢麗譙衣香逐嬌
去眼語送杯嬌餘罇盡復益自得是逍遙

獨酌謠獨酌一樽酒樽酒傾未酌明月正當牖是牖非

園甕吾樂非擊缶自任物外懽更齊椿菌久卷舒乃一卷忘情且十斗寧復語綺羅因情即山藪

同前

陸瑜

獨酌謠芳氣饒一傾蕩神慮再酌動神飈忽逢鳳樓下非待鸞弦招窗明影乘入人來香逆飄杯隨轉態盡釧逐畫杯搖桂宮非蜀郡當壚也至宵

同前

沈炯

獨酌謠獨酌謠獨酌獨長謠智者不我顧愚夫余不要

不愚復不智誰當余見招所以成獨酌一酌一傾瓢生
涯本湯湯神理暫超超再酌矜許史三酌傲松喬頻頻
四五酌不覺凌丹霄倏爾厭五鼎俄然賤九韶彭殤無
異塋夷跼可同朝龍蠖非不屈鵬鷃本逍遙寄語號呶
侶無乃太塵囂

羈謠

孔仲智

芳杜鵬春酒髣髴傷山時徒歌不成樂空以羈自悲羈
傷懷土心遽復還山路迨及春復時無使春光暮

筌篋謠

結交在相得骨肉何必親
甘言無忠實世薄多蘇秦
從風暫靡草富貴上昇天
不見山巔樹摧圯下為薪
豈甘井中泥上出作埃塵

同前

李白

攀天莫登龍走山莫騎虎
貴賤結交心不移唯有嚴陵
及光武周公稱大聖管蔡寧
相容漢謠一斗粟不與淮
南春兄弟尚路人吾心安所
從它人方寸間山海幾千

重輕言託朋友對面九疑峰多花必早落桃李不如松
管鮑久已死何人繼其蹤

玉漿泉謠

隋書曰豆盧勣為渭州刺史甚有惠政華
夷悅服大致祥瑞鳥鼠山俗呼為高武隴
其下渭水所出其山絕壁千尋由來乏水
諸羗苦之勣馬足所踐忽飛泉湧出有白
鳥翔止廳前乳子而後去民為之謠後因

號其泉曰玉漿泉

我有丹陽山出玉漿濟我人夷神烏來翔

鄴城童子謠

李賀

鄴城中算塵起將黑丸斫文吏棘為鞭虎為馬團團走
鄴城下切玉劍射日弓獻何人奉相公扶藪來閣右兒
香掃塗相公歸

唐天寶中京兆謠

唐書曰李峴為京兆尹甚著聲績天寶中

連雨六十餘日宰臣楊國忠惡其不附已
以雨災歸京兆尹乃出為長沙太守時京
師米麥踊貴百姓為之謠其為政得人心
如此

欲得米麥賤無過追李峴

樂府詩集卷八十七